

lian, maibé silénsiu kontinua. Problema mosu bainhira irmán sira halo rekreiu: sira halimar, hakilar, haksoit hodi hatudu ksolok boot; rungu-ranga ne'e halo sientista lakon ninia konsentrasaun. Ba loron ruma, sientista ida ne'e tahan, nia dehan ba ninia an: "Feto sira ne'e... sira ki'ak, moris iha peniténsia, la iha mane ida ne'ebé hadomi sira, oinsá sira bele haksolok nune'e? Keta karik iha buat ruma la loos!". Nia hein tan loron ida, hafoin nia bolu superiora no husu ba nia atu esplika hahalok sira ne'e. Superiora hatán: "Ami Jezús nia espoza sira". Katuas simu hodi dehan: "Maibé imi-nia kaben mate tinan 2000 resin liubá". Superiora hamnasa midar, hafoin dehan: "Deskulpa, maibé profesór nia informasaun sira mak atrazadu. Karik profesór la hatene katak liu loron tolu Nia moris hi'as; no ami fô sasin kona-ba akontesimentu ida ne'e."

Ema ne'ebé hasoru ita bele haree ita-nia ksolok?

Oinsá nu'udar grupu animadór ita hatudu ita-nia esperansa no ksolok ba oratorianu sira?

"Se karik buat hotu aat, ha'u otimista, tanba Kristu moris hi'as. Tanba Kristu moris hi'as, ha'u la ta'uk mate; tanba Kristu moris hi'as, ha'u fiar iha mundu ne'ebé di'ak liu".
(Edukadór ida)

Saida mak ita bele halo atu hatudu ita-nia ksolok?

"Ida ne'ebé hatene Páskua la bele hetan düvida"
(D. Bonhoffer)

ITA REZA HAMUTUK

Na'i Jezús ne'ebé moris hi'as, tulun ami atu rekoñese Ita iha ami-nia moris loron-loron nian. Tulun ami atu hateten: "Ita mak Na'i" iha momentu ida-idak, iha esperiénsia pozitiva no iha esperiénsia negativa atu ami bele aprende atu hasoru susar ho konfiansa ba Ita-nia prezensa no ba tulun ne'ebé ami sei simu liuhusi ema ne'ebé ko'alia kona-ba Ita.

FORMASAUN ANIMADÓR SIRA ORATÓRIU NIAN (2)

HA'U FIAR JEZÚS NE'EBÉ LIU LORON 3 MORIS HI'AS

Ita kontinua ita-nia reflesau kona-ba Jezús hodi uza Katesizmu Youcat ne'ebé Amu-Papa Bento XVI fô nu'udar prezente ba foin-sa'e sira ne'ebé partisipa ba Loron Mundiál foin-sa'e sira nian iha Madrid, iha tinan 2011. Iha Katesizmu ida ne'e, Santa Kreda koko atu hatán ba pergunta sira ne'ebé dala barak mosu iha foin-sa'e sira leet hodi "tradúz" Kreda Katólíka nian ba linguaen ne'ebé foin-sa'e sira bele komprende. Ita foin selebra Jezús ne'ebé moris hi'as, tan ne'e ita sei hakle'an Mistériu ida ne'e atu bele transforma ita-nia moris.



Ita bele moris nu'udar sarani hodi la fiar katak Jezús moris hi'as?

Lae. Basá, hanesan S. Paulo dehan, "Kristu la moris hi'as karik, ne'e duni lia ne'ebé ami haklaken mós folin laek; imi-nia fiar mós folin laek" (1Kor 15,14). (KKK 631.638.651)

Eventu mate no moris hi'as Kristu nian mak sentru Kristianizmu nian, su porta ita-nia fiar, hametin ita-nia serte;a, no hanesan anin boot ne'ebé hadook ta'uk no duvida hotu.



Oinsá eskolante sira biban atu fiar katak Jezús moris hi'as?

Eskolante sira, ne'ebé foufoun lakon ona esperansa, ikus mai sira fiar ba Resurreisaun tanba haree Jezús iha momentu oin-oin, sira hasoru Nia depoiizde ninia mate no sira ko'alia ba Nia hodi halo esperiénsia katak Nia moris hela. (KKK 640-644.656)

Buat ne'ebé akontese iha Jerusalem ba Jezús, la'ós istória ida ne'ebé ema inventa, tanba eskolante sira, bainhira haree Jezús nian terus no mate, halai dook ka subar no taka an iha uma laran. Jezús moris hi'as de'it liberta sira husi sira-nia ta'uk no hakonu sira ho fiar no entusiazmu.

? Iha prova ruma katak Jezús moris hi'as?

Kona-ba Moris hi'as la iha “prova sientífika”, maibé iha ema sira no grupu sira nia sasin ne'ebé ko'alia kona-ba akontesimentu Jerusalém nian. (KKK 639-644. 647. 656-657)


Rate mamuk la bele sai prova ida katak Jezús moris hi'as, tanba ema bele dehan, hanesan soldadu sira uluk halo, katak ema na'ok Jezús nia isin mate. Maibé sarani sira iha “dokumentu” ruma ne'ebé haktuir akontesimentu ida ne'e.

Dokumentu antigu nian ne'ebé fó sasin kona-ba Moris hi'as mak surat ida ne'ebé s. Paulo hakerek ba sarani sira iha Korintu, bainhira foin liu tinan 20 husi Jezús nia mate. “Basá ha'u saran ba imi nu'udar buat ne'ebé folin boot liu buat hot-hotu ne'ebé ha'u mós simu tiha: katak Kristu mate tan ita-nia sala sira tuir Eskritura; katak ema hakoi Nia; katak liu tiha loron tolu, Nia moris hi'as tuir Eskritura; katak Nia mosu ba Cefas, tuir mai ba sira sanulu-resin-rua. Ne'e hotu tiha, Nia mosu ba maun alin na'in atus lima iha tempu ida de'it, no sira ne'e barak sei moris daudaun, maski balun mate ona.” (1Kor 15,3-6) Iha ne'e ita komprende katak iha “sasin kualifikadu” kona-ba Jezús nia moris hi'as no hanesan “korrente” ida, husi sira ne'ebé haree ho sira-nia matan, fiar to'o mai ita.

? Hodi moris hi'as Jezús hetan fali isin ida hanesan molok mate?

Jezús moris hi'as halo eskolante sira haree ninia kanek no book ninia isin; maibé ninia isin la pretense ona ba ita-nia mundu, Nia halo parte ona Reinu lalehan Aman Maromak nian (KKK 645-646)

Maski eskolante sira hare Jezús nia isin no, hanesan Tomé, bele hatama liman iha Ninia kanek, Jezús nia isin la hanesan ona uluk: eskolante sira la rekoñese Nia, Nia bele liu husi odamatan sira ne'ebé taka hela. Nune'e bele dehan katak Ninia moris hi'as la'ós hanesan Lázaro ne'ebé hetan fali moris hanesan maibé nia sei mate fali. Jezús tama iha moris “diferente”, no Nia sei moris nune'e ba nafatin. (Kf Rom 6,9)



? Saida mak troka iha mundu ho Moris hi'as?

Tanba Jezús manán mate, ksolok no esperansa loos tama iha ita-nia mundu; no se mate la iha ona kbiit hasoru Jezús, sei la iha kbiit hasoru ita, ne'ebé Jezús ninian (KKK 655.658)

Moris hi'as iha signifikadu sá de'it ba ha'u-nia moris?

Molok fahe ita-nia “resposta” ba pergunta sira ne'e, ida-idak bele ba lee pasajen bibliku ruma, iha ne'ebé haktuir eskolante sira no feto sira nia esperiênsia ho Jezús no koko atu reflète oinsá nia bele halo esperiênsia hanesan iha ninia moris loron-loron nian.

“Sira ne'ebé rona lia-menon paskál la bele moris ona ho oin boot ka moris lahó espírito, iha lutu laran, tanba sira ne'ebé la iha esperansa mak moris nune'e.” (F. Schiller)

- * Jo 20,1-18
- * Lk 24,5-6
- * Lk 24, 28-33

- * Lk 24,36-39
- * Jo 20,24-29
- * Jo 21,4-7

Iha assembleia ema ida-idak ka grupu ida-idak fahe buat ne'ebé nia deskobre kona-ba Jezús nia moris hi'as

ISTÓRIA IDA



Ema siénsia nian buka fatin hakmatek ida iha ne'ebé bele ba estuda; nia hetan ospitalidade iha konventu ida ho irmán sira klauzura nian. Ema ida ne'e la fiar ba Maromak, maibé nia hanoín katak fatin ida ne'ebá favorese klima silénsiu nian atu nia bele hala'o ninia peskiza. Loos duni, iha oras barak uma tomak nonok de'it, dala ruma sinu ki'ik-oan